

OWEN, LEWIS ('y Barwn Owen '; bu farw 1555), swyddog gwladol

Enw: Lewis Owen
Dyddiad marw: 1555
Plentyn: John Lewis Owen
Plentyn: Hugh Lewis Owen
Plentyn: Griffith Owen
Plentyn: Edward Owen
Plentyn: Robert Owen
Rhiant: Owen ap Hywel ap Llywelyn
Rhyw: Gwryw
Galwedigaeth: swyddog gwladol
Maes gweithgaredd: Cyfraith; Gwasanaethau Cyhoeddus a Chymdeithasol, Gweinyddiaeth Sifil
Awdur: Robert Thomas Jenkins

Mab i Owen ap Hywel ap Llywelyn, o'r Llwyn, Dolgellau. Dan Harri VIII penodwyd ef yn ddirprwy-siambrlen Gwynedd, ac yn ' farwn ' (h.y. yn farnwr) yn nhrysorlys Caernarfon; bu'n siryf Meirion yn 1545-6 a 1554-5, ac yn aelod seneddol drosti yn 1547, 1553, a 1554; preswyliai yng Nghwrt Plas-yn-dre, Dolgellau. Yn ei swydd fel siryf, aeth ati i ddifodi ' Gwyliaid Cochion Mawddwy '; dialwyd arno am hynny gan ei ladd, 12 Hydref 1555, yn y fan a elwir hyd heddiw'n ' Lliart y Barwn,' ger Mallwyd.

Bu'n briod ddwywaith, ac o'i briodas gyntaf yr hanoedd nifer anarferol fawr o uchelwyr diweddarach Meirion, y coffeir amryw ohonynt yn y gwaith hwn; gweler [J. E. Griffith](#), *Pedigrees*, 363. O'r mab hynaf, JOHN OWEN o'r Llwyn, y tarddodd cainc Bronclydwr (gweler [Hugh Owen](#), 1639 - 1700). Gellid meddwl mai o'r ail fab, HUGH LEWIS OWEN o Gae'r-berllan, Dolgellau, cyfreithiwr, yr hanoedd teulu Tan-y-gadair (gweler [Henry Owen](#), 1716 - 1795), ond ni ddangosir hynny gan [Griffith](#), a byddai'n annoeth bod yn bendant. Y trydydd mab, EDWARD OWEN o'r Hengwrt ([Griffith](#), op. cit., 201), oedd taid yr hynafiaethydd [Robert Vaughan](#), a hynaif teuluoedd diweddarach [Hengwrt a Nannau](#). Priododd y pedwerydd mab, [GRIFFITH OWEN](#) (o Dalybont, Llanegryn), ag aeres [Peniarth](#) ([Griffith](#), op. cit., 323); deil rhai mai mab hynaf hwn, Lewis Owen, oedd '[Lewis Owen yr ysbïwr](#) ', a phe profid hynny (ond siglog yw'r dystiolaeth) fe fyddai'r ' ysbïwr ' yn daid i'r Annibynnwr enwog o Fronclydwr, oblegid Susan, ferch Lewis Owen o Dalybont, oedd mam '[Apostol y Gogledd](#) ' - fe welir bod teuluoedd Bronclydwr a Thalybont, ill dau'n hanfod o'r ' Barwn Owen,' wedi ymbriodi. Mab arall i [Griffith Owen](#) oedd Henry Owen, tad y diwinydd enwog [John Owen](#), 1616 - 1683. Pumed mab y ' Barwn Owen ' oedd ROBERT OWEN o Ddolserau (Dolgellau), gweler [Griffith](#), op. cit., 363, taid y Crynwr [Robert Owen](#), a hendaidd y Crynwr [Griffith Owen](#).

Awdur

Yr Athro Emeritus Robert Thomas Jenkins, (1881 - 1969)

Ffynonellau

History of the Princes, the Lords Marcher, and the Ancient Nobility of Powys Fadog, vi, 409-10, 464

Oxford Dictionary of National Biography

J. E. Griffith (uchod)

Darllen Pellach

Erthygl Wicipedia: [Lewys ab Owain](#)

Dolenni Ychwanegol

Wikidata: [Q6537243](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Nghymru a thu hwnt.

Ewch i'n [tudalen codi arian](#) am ragor o wybodaeth.

